

Gwii-nkise: You are going to fall through
Debaajmod: Alvin Ted Corbiere
Anishinaabebii'ged: Alan T Corbiere

Nahaaw, mii maanda nahii, zaag'igaans, mskowaabgankaag zhinkaade kina maanda e-teg. Gidaabik maanda te, wedi go bezhig bemaabkaag. Dbi zhiwi maanda endaa'iw'ngwenh wi nbiish. Gaa'sh giiwenh maamdaa zhiwi wii-ni-tkamseng bboong, mkomiing. Kaa maamdaa zhiwi go wiya ji-tkamangba, maanda nikeyiing, maage wi nikeyiing. Gwii-nkise iishin. Gewii gii-kido wa akiwenziiba, mii gaa-igoowaangba wi. Kina'sh go maanda. Kina go ji-sapojiishkog aawan wi. Aapji wiinjiishkogaa zhiwi. Nchiimaawaagmi go maanda nbiish. Gaawii maamdaa wii-mnikwed wiya wi. Mii go wi zhimaagwag, mii wi e-naagmig wi. Bngii go naa genii, n-ninj go naa ngii-nakaazan wii-gjipdamaanh wi nbiish. Aapji go maanaadaagmi. Gaa go waawaach zhiwi maamdaa naa wii-yaawaad, zhiishiibag, gaa'sh go maamdaa wesiinh wii-mnikwed wi nbiish. Zaam maanaadaagmi, nchiimaawaagmi. Kina go zhiwi naama'iinh, mii wi zhiwi ezhi-nkiseyin zhiwi aanwii-zhaayin, aapji nookjiishkogaa wi. Aapji gaasin zhiwi maanda, gaasabiiyaa go naa zhiwi. Gaawii go mshkosi maanda aawzinoo. Maanpii gnimaa eta giiwtaaya'iinh. Miinwaa oodi e-kwaaya'iinh mshkosi aawan. Gaa'shii gnige, gaawii biinaagmisnoo wi nbiish, nchiimaawaagmi. Manj geye e-kwiindmaagwenh zhiwi naanaawa'iinh, n-kendziin. Aapji go naa gnimaa dkwiindmaadag kina maanda zhooshkanaabik. Naama'iinh manj dash wenji-, aapji shwii go wiinjiishkogaa zhiwi, kina'sh go maanda zhooshkanaabik aawan. Mii wi gaa-kidba ko akiwenziinh-ba. Gaa'sh wiikaa gegeti go zhiwi wiya n-ndawaabmaasii ji-bbaayaad nbiing, maage zhi-tkamiid maage wii-ngidaase iishin. Mii gaa-igoowaangba. Nahaaw.

© M'Chigeeng First Nation